

欽定剿平粵匪方略

欽定勦平粵匪方略卷四十七 癸丑年

六月二十三日 丙申

上諭內閣曰前因被兵省分地方官先將家屬移徙出城以致士民紛紛遷避特降諭旨通行曉諭各該地方官自應恪遵諭旨鎮靜撫綏以期固結人心保守疆宇茲聞近賊各省會府縣地方仍有官吏先搬眷屬致令紳士商民遷徙不能禁止者似此遇事張皇

何以爲民保障現在河南賊匪漸就肅清河北竄擾
餘匪亦經疊受懲創其鄰近之直隸山東山西陝西
等省防堵綦嚴各該省士民等諒能自安生業共衛
鄉閭著再申諭各督撫如地方官仍有遷移眷屬以
致搖惑民心者卽行查明嚴叅懲辦

二十四日

丁酉

上命軍機大臣傳諭琦善慧成曰前因賊匪竄擾豫省

諭令慧成帶兵徑赴河北一帶會剿現在河南之賊
已經柏山追剿殲除殆盡河北懷慶一帶匪徒亦經
托明阿等大獲勝仗訥爾經額現派直隸鎮將進剿
恩華勝保李德均帶官兵馳赴懷慶兵力足資剿辦
昨據向榮奏鎮江官兵接仗失利賊匪搶占各處營
盤我兵既有潰敗賊勢自更猖獗難保不乘勢渡江
北竄刻下江北一帶江浦六合等處雖有重兵而安

徵各要隘及清江浦兵力尙單朕思慧成帶兵一千
九百餘名尙在邳徐之間容照所帶之兵亦甫由清
江啟行水陸紆折卽使趕到衛輝已緩不濟急著琦
善體察情形如江北需兵緊急卽一面奏聞一面飛
咨慧成並行知容照將所帶官兵擇要屯紮以便調
度慧成接奉此旨亦卽與琦善會商相機籌辦總以
南防江口北扼淮徐廬鳳迅圖克復揚城爲要

二十五日戊戌琦善陳金綬雷以誠奏言臣等攻

勦揚城決旬以來無計不施而賊衆城堅難期
得手漕臣福濟以揚城東南正臨運河議用糧
船裝載兵勇乘流而下直逼城東以船尾本高
上用長木支搭接鋪木板冀可魚貫登城定於
本月十八日同時爬城東關用糧船上城北面
仍用雲梯仰攻適鄖陽鎮瞿騰龍由六合防堵

折回臣等因飭該鎮與雙來一同督兵進攻搭橋過河直抵城下賊匪槍礮如雨雙來瞿騰龍身先士卒賈勇向前用擡槍擡礮竭力仰攻斃賊多名賊匪穴城設礮乘高下擊我兵轉戰不退雙來右髀被大礮子打穿經兵丁擡回現在疼痛昏暈趕緊延醫診視據云筋骨已傷能否醫治就痊尙未可定查雙來素稱勇敢能得士

心新奉

恩旨賞加提督銜益加感奮此次攻城身受重傷尤爲
忠勇出力臣等囑其安心調養冀得就痊是日
漕臣福濟在東關督帶漕船行抵城下張翊國
等帶領壯勇正欲搭板上城適風力過猛水勇
等未及掉轉船尾而竹纜已斷張翊國祇得跳
下賊匪施放槍礮並將火彈擲下水勇立時潰

集之早...
散賊復縋城而下縱火焚燬漕船一隻經張翊
國等開放槍礮奮力攻剿殺傷賊匪約六七十
人始行退去現在臣等會商必須另籌良策合
力攻剿以圖克復

琦善陳金綬雷以誠又奏言正在繕摺間提督
銜甘肅肅州鎮總兵雙來於本日申刻因傷重
出缺查該總兵此次來揚力圖報效勇冠三軍

茲以會攻揚城受傷過重遽至不起軍中將士
無不爲之隕涕該總兵家道甚寒僅有一子常
山年十八歲並無官職在京居住其身後事宜
臣等妥爲料理該總兵因傷出缺與臨陣捐軀
者無異儻蒙

聖恩垂憐以勵士氣而慰忠魂出自

逾格鴻慈奏入

上諭曰雙來何如是不幸旋卽出缺朕隕涕覽奏不勝
悲憤然視彼貪生退縮者奚啻霄壤朕卽有恩旨以
慰忠魂以勵臣節雙來靈柩回京時專摺馳奏

琦善陳金綬雷以誠又奏言虹橋爲揚州至瓜
州水陸通衢自鍾淮陣亡後所練民勇漸形渙
散商之漕臣福濟添派漕河兩標弁兵二百餘
名並委知府福楸管帶壯勇四百名駐紮虹橋

並委令已革參將文玉都司宋天麒馳往虹橋
幫同福楸防堵又飛咨向榮飭令艇船停泊於
七號口八號口之間原冀艇船與虹橋兵勇水
陸夾攻使腹背受敵俾易得手詎料提督鄧紹
良在鎮江接仗失利營盤被焚退至丹徒鎮以
致艇船不能駛上瓜州之賊聯成一氣進窺虹
橋六月十五日突有賊匪千餘人蠶擁至虹橋

燒燬民房經山東官兵施放槍礮斃賊多名嗣因賊至愈多山東兵傷亡過甚衆寡不敵福楸所帶之勇漕河兩標之兵亦均潰退此次虹橋失利實因該處練勇已散兵力較單所致文王宋天麒十三日甫委赴虹橋且未督帶兵勇應毋庸議臣等仍責令該革員等及間散旗人書義協同紳士再行籌議設法攻守此外容臣等

與福濟查明再行覈辦查該逆由瓜州進至虹橋巢穴益多路徑紛歧處處可通揚城實有難以兼顧之勢三汊河本有防兵臣琦善又添派官兵前往防守其餘東路堵禦事宜臣雷以誠與福濟設法辦理

琦善陳金綬雷以誠又奏言六月初三四等日有賊船至六合縣之斷要地方停泊窺伺幸被

兵勇擊退並據變儀使武慶等稟稱六月十二日浦口忽來賊船十餘隻經武慶等督率官兵施放火箭燒燬賊船八隻生擒廣西兩湖授有僞職之賊匪十三人當卽正法等因是該逆注意六合等處欲圖北竄軍營督率無人諸事更形棘手不得已仰乞

天恩俯准將瞿騰龍帶兵暫留揚州以資守禦奏入

上命軍機大臣傳諭琦善陳金綬雷以誠福濟曰逆匪
占踞三城屢次諭令該大臣等設法收復乃該大臣
等會攻揚城仍未得手轉致損兵折將虹橋兵勇又
多潰散似此情形三城何日可復逆匪何日可平昨
因鎮江官兵失利恐賊勢愈張江北一帶更形喫重
已諭令該大臣酌量將慧成及容照所帶之兵擇要
屯紮相機調度今虹橋旣爲賊占揚城與瓜州之賊

聯爲一氣難保不潛圖北竄琦善等遵照前旨飛咨
慧成並行知容照卽將所帶官兵擇要布置以爲大
營策應南門一帶應如何設法阻隔賊路虹橋要地
仍當激勵該處兵民紳勇併力收復其東路堵禦事
宜並著雷以誠與福濟嚴密籌辦瞿騰龍及所帶各
兵著准其留於揚州隨同攻剿惟六合等處及安徽
近江要隘萬不可再有疏虞應如何扼要堵截著琦

善體察情形通籌辦理並知照周天爵李嘉端等一體嚴防

上諭內閣曰甘肅肅州鎮總兵雙來朕知其勇敢忠誠特加簡任擢授總兵調赴軍營隨同琦善等攻剿揚城賊匪果能奮勇當先攻破土城連次殲斃匪黨當經降旨嘉獎並賞給白玉翎管嗣因登城督戰頗受槍傷復賞加提督銜方冀迅殄妖氛更膺懋賞茲因

進攻揚城帶傷力戰以致殞命覽奏不勝悼惜雙來
著加恩照提督陣亡例賜卹任內一切處分悉予開
復應得卹典該衙門察例具奏並著賞給廣儲司銀
一千兩交伊家屬祇領靈柩回京時著琦善等專摺
馳奏並著沿途地方官妥爲照料准其入城治喪伊
子常山著俟百日孝滿後交該旗帶領引見用示朕
褒忠延賞之意

二十六日

己亥

訥爾經額恩華奏言查懷慶北路

沁丹二河之間賊匪聚集甚衆其丹河北岸經
董占元統帶官兵擊敗後卽督隊過河村西大
路賊匪蠡擁來撲約千餘人豎立大黃旗多係
長髮老賊守備龍汝元令兵誘賊出村施放槍
礮連環攻擊賊衆於三村內外轉換出應並繞
至東南河岸欲抄我兵後路復經槍礮環擊餘

賊藏入高粱地內我兵奮勇越出隊外施放火
箭焚燒復傷斃賊匪一百餘名餘匪概行遁去
我兵收隊過河計共殲斃紅衣賊目二名賊匪
三百餘名生擒十一名臣恩華卽親統弁兵進
抵清化鎮以資合剿奏入

上命軍機大臣傳諭訥爾經額恩華托明阿曰總兵董
占元等分路進攻旣經獲勝托明阿善祿接仗情形

續當奏報勝保渡河後計已馳抵該府李德想亦趕到該大臣等務當嚴飭官兵四面兜剿聚而殲旃勿留餘孽

二十七日庚子漕運總督福濟奏言現在賊匪困

守揚城奸細四出探知勝保慧成帶去精兵數千東北兵力獨形單弱日向東關一帶縋城出擾瓜州賊匪時常竄出冀與揚州城內會合設

該匪避強攻弱併力而來臣等兵勇旣不能支
琦善所帶官兵尙形不足亦難兼顧灣頭係高
寶外障清江鎖鑰關繫綦重連日探知河南賊
匪受創勝保所帶兵勇尾追亦慮不及惟有仰
懇

天恩俯准飭令勝保折回灣頭駐紮防剿並懇就近先
撥壽春鎮兵千餘名交臣福濟領帶以遏賊匪

北竄清江之路庶揚州可期克復不至他虞奏
入

上命軍機大臣傳諭琦善陳金綬雷以誠慧成福濟曰
灣頭係清江鎖鑰自應添兵接濟以期防剿得力惟
勝保現已行抵豫省渡河會剿懷慶賊匪未便遠道
折回安徽兵力亦單壽春鎮兵能否分撥亦難懸度
惟慧成所帶官兵一千九百餘名及容照所帶官兵

均由徐邳一帶水路行走可以就近截留著琦善等仍遵前旨分別咨照慧成容照等何路緊要卽將所帶官兵扼要布置其東北一路亦著添兵策應

同日署江甯布政使浙江布政使麟桂奏言本月十三日臣正在焦山口門與各鎮分撥師船遙見南岸煙燄四起據探賊匪數百出北門轉東門直撲陸路大營各營火起官兵同時潰散

營盤盡爲焚燬提臣鄧紹良移紮丹陽隨經管帶潮勇之董事劉廷鎮管理糧臺之知府豫立所募霜勇頭目李茂章兩隊壯勇由東南兩路奮力迎擊賊匪尙未南竄臣當與各鎮會商師船向泊焦山原與陸營犄角今陸兵潰散鎮城東面丹徒鎮爲蘇常第一門戶不可不豫爲防禦隨飛飭豫立等趕緊將潮勇霜勇調赴丹徒

並諭紳董姚金誥招集局勇會合嚴防又分撥
師船馳往接應復於十五日見北岸揚州內河
虹橋鎮火起居民亦皆逃避又見南岸賊匪竄
入丹徒等處幸有埋伏兵勇水陸夾擊斬獲首
級五顆生擒賊目一名殺斃數十名賊方退走
該勇等實屬奮勇當此用人之際臣先行酌賞
翎頂以示鼓勵然此處兵勇單弱儻賊匪大隊

擁來勢難抵敵該逆抄出圖山關奪占礮臺以
遏師船後路則我兵前後受敵且萬餘斤大礮
已爲賊有傳聞已移運北固山下師船勢難駐
泊舊處茲與各鎮熟商持以鎮定儻萬難停泊
卽將師艇各船調泊丹徒江面會合陸路各勇
扼守大船三板等船分泊圖山關上下糧臺船
隻暫移圖山關下之吳家橋相機督辦以截其

江面南竄之路並請

諭向榮飛速分兵堵截蘇常要路一面圍攻鎮城庶江浙可保無虞而水師亦不致腹背受敵奏入

上命軍機大臣傳諭向榮怡良許乃釗和春麟桂曰據麟桂奏稱賊匪數百人由鎮江北門轉至東門直撲陸路大營各營火起官兵同時潰散鄧紹良移紮丹陽是此次鎮江失事該官兵並未與賊接仗其漫無

準備可知丹徒鎮爲蘇常緊要門戶經該藩司飛飭
地方官豫調潮勇霜勇前往埋伏雖於十五日擒斬
賊匪多名而十七日該逆擁衆出城潮勇等衆寡不
敵旋即退走其江北虹橋一路亦復被賊焚燒官兵
潰散大江南北兩岸陸路可守之處險要旣失則我
兵節節被阻而賊蹤路路可通師船停泊江心亦必
勢成孤注向榮所派和春帶往赴援之兵已於十五

日起程計期早可趕到此時丹徒鎮是否收復應於何處進攻遏其下竄之路副將瑞格等退駐馬陵之兵尙有一千五百名應如何會合策應怡良接奉前旨定當剋日赴該處督辦著卽迅速進兵水陸嚴防萬不可再有疏失至麟桂所帶水師艇船舊處恐難停泊擬調泊丹徒江面自係丹徒鎮未經失利以前之語現在應作何布置亟須妥籌和春李德麟均有

水師之責毋得稍存諉卸糧臺船隻尤關緊要該藩
司既令暫移圖山關下有舢舨三板等船一同分泊
儘可妥爲保護廣東所雇紅單船前據該省奏先於
五月二十一日開放二十隻計一月上旬已可駛入
江口此項船隻多係生力水勇會合進剿必能得力
一俟入江卽著和春麟桂李德麟等相機調遣攻剿
至十五日擒斬賊匪各勇經麟桂先行賞給翎頂係

爲鼓勵兵心起見自應如此辦理該大臣等仍須飭諭地方聯絡兵民迅圖克復

上又命軍機大臣傳諭葉名琛柏貴曰現在鎮江接仗不能得手營盤爲賊焚搶揚州虹橋亦被賊踞總因水師艇船不多未能斷賊江面來往之路本日據麟桂奏上下游艇船俱甚單薄江面萬分喫緊必得舟師迅往應援著葉名琛柏貴迅飭遊擊吳全美將續

雇之紅單船若干隻配足弁兵礮械火藥鉛丸趕緊
管帶起程駛往江南聽候調遣至前次陳國泰管帶
船二十隻於五月二十一日起程現尙未駛入江口
著一併飛咨沿海口岸毋任稍有逗留總期早到一
日早得一日之用萬不可遲延貽誤

二十九日

壬寅

訥爾經額奏言 臣行抵彰德府城

接據將軍托明阿並大名鎮董占元函稟董占

元等會攻賊巢分爲三路前進其東路獲勝情形業已奏報在案董占元攻其西北於十九日潛渡丹河前進見有賊匪卽行撲捕斃賊二三十名餘匪逃回懷慶城外北關賊營約同衆賊出營拒敵我兵用礮轟斃賊匪二百餘名賊卽退回營盤該鎮察看賊營環立木板護以土堆周圍設有礮眼建有礮臺督兵奮力轟擊將看

守礮臺之賊擊斃自辰至未統計斃賊三百餘
名賊匪不敢出營拒敵臣查賊營防禦甚固必
應乘勢進攻破其巢穴使之不能容身內閣學
士勝保現亦督兵過河已令探明何路有賊卽
赴何路進剿一面飛咨慧成扼守河岸遏其肆
竄並因衛輝府屬之輝縣一帶路徑紛歧若賊
自懷慶分竄可由輝縣武安徑入直隸磁州臣

已派委運司楊需等帶兵五百名前往輝縣扼要防守其磁州地方現駐馬蘭通永鎮標兵四百餘名又將山西頭二起兵一千名內撥出八百名併駐磁州其餘山西兵二百名駐紮廣平府城守護糧臺又磁州後路之臨洺關屯駐盛京吉林馬步隊兵共四千名又臨洺關後路之正定府爲畿南要地已將山西三四起兵一千

名撥在正定府城駐紮其山西五六起兵一千名撥在保定省城連存城督標並滿營兵共一千數百名加以署提臣保恆管帶之提標兵五百名統計省城官兵不下三千名之數足資防守並調駐臨洺關之

盛京吉林官兵由天津換船從衛河水路前來設逆匪竄入衛河該官兵正可迎頭截擊至天津

地方臣已奏明留駐

盛京兵二千名並鎮標存營以及附近之大沽葛
沽等營官兵計有三千餘名實屬緩急可恃臣
卽統帶宣化天津通永等鎮標兵一千餘名進
駐衛輝會同托明阿恩華督飭各路官兵會合
剿洗奏入

上命軍機大臣傳諭誦爾經額恩華托明阿曰此次烏

蘭都及董占元兩路斬擒賊匪已不下七百餘名若
托明阿等所攻東南一路亦能得手則賊勢窮蹙惟
董占元在懷慶二十里鋪迤北安營未免距賊太遠
仍應飭令移營前進逼近賊壘進剿方能應手賊營
恃其木板土堆匿不出戰該大臣現已統兵進駐衛
輝去懷慶密邇著卽就近嚴飭各路官兵合力圍剿
迅速蔽功萬不可任其竄逸致滋蔓延所稱後路布

置一切均尙周密惟慧成與容照所帶之兵甫至邵
徐一帶前已有旨令其折回爲琦善等大營聲援該
大臣所稱扼守河岸之處著卽另派得力文武在彼
駐紮

同日曾國藩奏言竊維戡亂莫先於得人而得
一文臣尤莫如得一武將臣到省以來留心察
訪大小將弁求其臨陣不怯爲士卒所信服者

實難其人惟查有升用遊擊署撫標中軍參將
塔齊布忠勇奮發習勞耐苦深得兵心軍士皆
樂爲之用又有准補千總武舉諸殿元精明練
達膽勇過人管帶辰勇百人操練日久各有兼
人之藝塔齊布統領辰勇與該武舉同心努力
皆思盡忠報效伏乞

皇上天恩破格超擢當湖南防堵喫緊之際獎拔一人

冀以鼓勵衆心如該二人日後有臨陣退縮之事卽將臣一併治罪奏入

上諭內閣曰湖南署撫標中軍參將遇缺升用遊擊藍翎都司塔齊布人甚奮勇能耐勞苦深得兵心藍翎永綏協左哨千總諸殿元管帶壯勇精於操練塔齊布著賞給副將銜諸殿元著以守備補用先換頂戴以示鼓勵

三十日癸卯向榮許乃釗奏言臣等據鄧紹良稟

稱自六月以來天氣酷暑營中兵將患病甚多
飭令將弁各於該管營中查點患病及受傷各
兵勇於附近民房調治而近城營盤管礮兵丁
患病尤多正在分別募補間突於十三日城中
出有二三千賊前來撲營前三營兵勇出六成
隊迎敵中兩營繼之忽北固山一帶衝出賊匪

約三四千抄截各營後路復於城垣開一暗門
從旁衝出直撲大營施放火箭火罐寨棚帳房
一時齊燃七營俱焚兵已潰散和春管帶湖南
等兵馳抵馬陵探知京峴山營盤被賊占踞丹
徒鎮亦被賊匪焚燒紮營和春卽由馬陵前駐
新豐以扼逆匪水陸南竄之路俟兵勇陸續到
齊相機拔營前進捐職都司劉廷鎮援救京峴

山各營斃賊甚多因營盤被燬孤立無援隨即
還至丹徒駐紮聞鄧紹良已在丹陽亦暫退回
丹陽旋即馳往新豐堵禦臣等查鄧紹良既因
天氣炎熱病兵過多應隨時散遣招補豈可任
其散漫無紀致賊分路誘戰猝墮詭謀賴有潮
勇力戰抵禦屢挫兇鋒丹陽常州一帶得以安
堵皆由潮勇之力該都司劉廷鎮駕馭得法號

令甚嚴各勇皆肯用命惟該勇人數僅止七百
名亦恃副將瑞格等所帶川黔兵一千五百名
屯紮南門一帶接應始能阻遏賊鋒當此挫衄
之餘尤宜分別功罪以昭懲勸除統領乖方之
提督鄧紹良已請

旨革職治罪外所有鎮江失守營盤之將弁等皆不能
奮力接戰固守營盤以致兵勇潰散均應請

旨革職治罪以肅軍令惟念該員等從征數載著有微勞一經革職轉得置身事外可否仰邀

聖恩責令帶兵打仗效力贖罪至陣亡之鎮軍千總唐彪等應請

飭部從優議卹其接應出力之管帶潮勇捐職都司劉廷鎡擬請

旨以都司儘先補用用昭激勸奏入

上命軍機大臣傳諭向榮怡良許乃釗曰鄧紹良因兵
丁傷病過多飭令調養乃聽其散漫住居民房以致
爲賊所襲縱火燒營現在和春管領官兵馳抵馬陵
旋由馬陵前駐新豐以扼逆匪水陸南竄之路復經
管帶潮勇之都司劉廷鏌力戰抵禦屢挫賊鋒現亦
馳往新豐堵禦副將瑞格等亦帶川黔各兵屯紮南
門互相策應惟鎮城日久未復急宜督兵進剿著該

大臣等嚴飭和春等分路進攻務將丹徒鎮賊匪悉
數殲滅麟桂所帶水師艇船現在調泊何處作何布
置怡良接奉前旨諒已馳赴該處著卽督同將弁水
陸夾攻剋期克復並宜加倍嚴防至金陵與賊相持
已踰數月疊經降旨嚴催尙謂無可乘之隙該大臣
等現在如何籌畫隨時奏聞以慰朕念

上諭內閣曰前因鎮江城外官兵營盤被賊焚搶當降

旨將提督鄧紹良先行革職令向榮等查明失事情
形據實具奏並飭和春迅帶勁兵馳往扼剿茲據奏
稱此次官兵失利實因備禦疏懈致賊分路誘戰墮
其詭謀鄧紹良平素打仗尙知奮勉是以疊加恩擢
洊升提督乃身統重兵未能迅速攻克鎮城轉以無
備失事實屬辜恩有負委任僅予革職不足蔽辜著
向榮等卽將該革員按律定擬罪名具奏仍交向榮

軍營責令帶罪自效其失守營盤之湖南撫標參將
韓世禧著以都司降補永州鎮右營遊擊朱占鰲著
以守備降補鎮寧守備儘先都司鄺益茂辰永道標
守備儘先都司劉嘉祥辰州城守營千總儘先都司
鄧紹英均著註銷儘先都司與寶慶守備田宗揚一
併降爲千總韓世禧朱占鰲劉嘉祥鄧紹英均著拔
去花翎鄺益茂田宗揚均著拔去藍翎以示薄懲仍

責令勦賊自效儻再不知愧奮卽行嚴叅治罪捐職
都司劉廷鏌管帶潮勇駕馭得宜屢挫賊鋒著以都
司儘先補用其陣亡之鎮筸鎮千總唐彪著交部照
例議卹舉人揀選知縣賀長庚著交部從優議卹和
春已有旨令其署理江南提督卽著督率鎮將迅復
郡城毋令逆匪竄逸

同日陸應穀奏言准柏山函稱十二日探有另

股賊匪渡河先竄卽帶官兵由西路田渡口過河令遊擊伊里綱阿帶兵由東路張塘過河賊匪聞風逃遁沿途追殺生擒長短髮賊一百三十餘名十三日經文岱亦帶馬隊趕到會同追至確山縣南京店地方逆匪放槍拒敵我兵奮勇爭先殺賊八十餘名卽在該處紮營十四日黎明拔寨追至五載河北岸賊已半渡南竄其

未渡者望見我兵紛紛撲河鳧水當卽揮兵追殺殲斃一百餘名溺水淹死者不計其數十五日賊至明港驛有淮河阻隔正在覓渡我兵追到槍礮齊施殲斃三十餘名該逆順河奔竄時值連朝大雨傾注且該處多係稻田人馬不能展步未得抄前截擊並准經文岱咨報十四日帶同候補遊擊全喜都司蘇林督率馬隊馳抵

三官廟遇有賊匪數百人我兵飛馳衝殺斃賊
二十餘名十六日又殲斃賊匪數名餘匪潰散
探聞竄往羅山正陽一帶現在咨催王家琳迅
帶官兵馳往會剿查此股逆賊節經剿殺敗賸
餘匪無多現有各路兵勇分路追擊即可一鼓
殲滅惟羅山正陽一帶擒匪最多恐爲該逆勾
結轉至汝甯光州等處滋擾不可不防現臣繞

道上蔡汝甯前進遏其東竄之路一面咨催柏
山經文岱王家琳盡力追剿務期殲滅淨絕奏
入

上命軍機大臣傳諭陸應穀曰該匪節經剿殺所餘諒
亦無幾惟羅山正陽一帶爲捻匪聚集之所急宜防
其勾結該撫繞道上蔡汝甯遏其東竄並咨催經文
岱等迅往會剿著卽嚴飭該總兵等分路兜捕務將

此股賊匪悉數殲滅毋令與捻匪勾結爲患

上又命軍機大臣傳諭訥爾經額恩華托明阿勝保李
德曰前經疊降諭旨令訥爾經額等嚴飭各路官兵
迅剿河北賊匪諒該大臣等已妥籌迅辦矣朕思懷
慶西北直通澤潞東界衛輝距畿輔甚近賊匪渡河
以來瞬將卅月該郡城火器最多賊所覬覦且堅守
已久城中乏食逆匪盤踞城外分布四門並於要路

挖濠蓋板鋪土外紮木營時用地雷攻城城中危急情形不堪設想恩華托明阿勝保李德現均帶兵趕到兵力不爲不厚而我軍紮營距城每在十里二十里之遙外援雖多與城內隔絕何能約期並舉內外夾擊力解重圍前命訥爾經額爲欽差大臣責以肅清河北諸臣亦皆統帶重兵赴援戰勝攻取豈容少事遷延著該大臣卽督率諸軍揀選驍勇精銳或四

面圍攻或出奇兵衝入賊營使該逆驚擾不能相顧則城中官兵便可開門追擊賊勢必潰河北關繫萬分緊要儻懷慶稍有疏失朕惟該大臣等是問又聞二十一日之戰董占元已逼近賊壘黑龍江官兵忽勒馬退回以致自相踐踏並被賊追殺傷亡兵丁且有參將千總在內何以未見奏到西凌阿係帶罪圖功之員此次黑龍江官兵是否另員管帶若仍係舊

集賢堂
三十一
隊則西凌阿罪無可追抑係續調之兵卽著該大臣
迅速查明按律叅辦毋得稍事姑容至懷慶迤北東
西一帶山徑叢雜均著派兵密防並知會哈芬嚴加
防範不可稍涉大意日來如何接仗解圍情形著迅
速具奏以慰廑念

同日

上諭內閣曰本年正月間逆匪自武昌潰圍而出竄入

江省直撲金陵經江甯將軍祥厚等督飭文武官兵
登陴守禦旋因城大兵單應援未至省城失陷朕聞
祥厚於外城陷後力守內城猶復騎馬督戰手刃數
賊砍折馬足倒地身受數十傷殞命忠勇捐軀被害
尤烈深堪憫惻祥厚著追贈太子太保銜照將軍陣
亡例從優賜卹伊子乾清門二等侍衛恩全著賞給
二等輕車都尉世職副都統霍隆武與該將軍同在

小門騎馬督戰被鉤落馬身受數傷遇害亦慘霍隆
武著照副都統陣亡例從優賜卹以慰忠魂已革兩
江總督陸建瀛由九江遇賊遠行折回貽誤軍機罪
無可追前降諭旨革職拏問查抄茲聞二月初十日
賊陷儀鳳門陸建瀛於十廟地方遇賊被害該革督
雖經失律於前尙不失城亡與亡之義陸建瀛著加
恩賞還總督銜卽照總督例賜卹所有查抄家產均

著賞還已故江甯布政使祁宿藻平時辦事認真朕
所素悉乃以籌防積勞於賊匪攻城之次日嘔血殞
命亦屬歿於王事祁宿藻著加恩照藩司軍營病故
例加等賜卹所有各該員任內一切處分悉予開復
應得卹典各該衙門分別察例具奏其餘同城文武
各員如何殉難情形著該大臣督撫等確查具奏候
旨賜卹